

BIPENNIS

in

Alto Sui Honoris

A S C I A,

ILLVSTRISSIMO

DOMINO

D. JOSEPHO

Comiti à Tenczyn

OSSOLINSKI

CAPITANEO SANDOMIRIENSI

Præfecturam Suam

auspicanti

in plausum

E V O L A N S.

*Dum*

Inter solennes plausus & festivas acclamationes publicæ lætitiæ uotò  
Sandomiriæ exciperetur

*A*

JOSEPHO WĘGRZYNOWICZ

in Alma Vniuersitate Crac: Philosophiæ & Eloquentiæ Auditore  
Officiosissimo Cultu

DELINEATA.

Annò Domini 1730 Die 14. *February.*



In  
Stemma  
ILLVSTRISSIMI  
DOMINI.



Vt semper Patriæ sit præsens una Bipennis,  
Hæret Sarmatico quàm benè fixa solo.  
Altera pennato motu circumvolat Orbem,  
Et modò sit summum, quodlibet audet opus.



# ILLUSTRISIME DOMINE.

Aug 9186 - 9199



Vblime Capitanealis Hono-  
ris fastigium *Tibi* hodie con-  
scendenti dum alij festivo cum  
jubilo occurrunt; ego bipen-  
nis gratulatorium *Tuum* ad-  
uolo in applausum. Dedecet enim humi



serpere mentes, quibus pro pennis promptitudo est & obligatio clientalis. Noui perbellè, quòd *Ascia Tua* celeres quosuis ingeniorum motus effugiat: cum sit *Bipennis in Alto sui Honoris*: unde in hac opera laudatrice pennato utor obsequio, Eandem in sublimi culmine officioso cultu venerando. Decuit quidem animum encomiastam plaudenti cothurno eluctari tam altum, ut merita *Tua* poscunt & in Penates meos effusa beneficia prætendunt; Sed parces *Illustrissime Domine* pusioni calamo & pennæ adolescenti, meumq; teneritudinis velle, ut in alijs masculum posse & operari grandævum, æstimabis. Arma *Tua* Gentilitia, *Bipennis in Alto sui Honoris Ascia*, non meæ pusillæ ætatis negotium, sed labor est & cogitatio sæculorum; ab his condignam panegyrim expecta & honorem, quem *Tua* merita in Senatu Polono justè sibi vendicant & ego voveo.

*Illustrissimæ  
Dominationis  
Vestræ*

profundissimus Cultor

Author Operis.



BIPENNIS

IN

ALTO SVI HONORIS

ASCIA.



*B*onis avibus in Altum Ho-  
noris TVI emergens, feli-  
cioribus momentis cum au-  
reo in Orbem Polonum re-  
deuntibus æuo: cum plau-  
su publico TE comitantibus gaudijs vi-  
am pandis. ILLVSTRISIME D O-  
MINE. Tranquilla quidem pace fruimur,  
B sed



sed non tam beatà; inter spes & vota,  
quibus eludimur, non sine animorum lu-  
cta, imò sæpius non sine graviore luctu vi-  
tam agentes; nunc jam patentibus in Tuo  
ingressu triumphalibus portis, toto agmi-  
ne ruunt feliciora quæq;, mentes insolita  
letitia perfundit. Et quidni ad sonum Ascix  
Tuæ magnifica architectantis opera festi-  
vos prorumpamus in plausus? quidni læ-  
tam explicemus frontem, fulgore eius Il-  
lustrissimo serenum inducente? Erigit  
hæc senatorias Curules, alta subsellia, au-  
gustas dignitatum ædes, & nostros erigit  
animos, ut non solitemus Deum Cyrrhea  
secreta moventem, nec de Tripode oracula  
scrutemur; sed ex Te Ipso sublimia Ho-  
norum scandente fastigia, omina fausta  
sumamus. Novit pridem Polonus Orbis  
instrumentum suæ felicitatis Asciam Tuam  
esse; quoties in altum sese attollentem ob-  
servat, per crebriores ictus, an ascensus ho-  
norificos Architectam sæculi melioris ado-  
rat. Ex acie noscitur Ascia Tua, quantorum  
sit in Orbe Sarmatico præsaga bonorum.  
Durioribus Illa hostium cervicibus allisa,  
flammas elicit triumphales; hinc splendor  
Pa-



*Patriæ: in Martiali campo ut hostilia capi-  
ta, sic victrices demetit laurus; hinc ampli-  
tudo Regnorum: barbarico innatat cruori;  
hinc purpuratus venit Poloniæ honor.  
Pax ipsa securior ab Ascia, cuius aciem  
adversa pertimescunt bella: cuius ope Re-  
gum solia solidiùs firmantur, boni publici  
moles assurgit feliciùs. Ponderavit sacrati-  
or Themis, vel ex Tuo Magnorum capa-  
ci, quò ad immortales ausus incalescis, a-  
nimo, quanta omnia ferat Ascia OSSO-  
LINIANA, hinc Illi, ut in Alto Hono-  
ris, pondere meritorum tractam Orbis e-  
minentius videat, iustitiæ propugnaculum,  
consiliorum Ædes, Castrum Sandomiri-  
ense cedit. Nempe, ut auspiciatus & securius  
iusta arbitria Themidis exerceantur, se-  
cures legum Custodes Præfecturam agant,  
neceffe. Intuere jam ILLVSTRIS-  
SIME DOMINE, quos Comites in Tuo ingressu  
habes, cerne tantæ felicitatis, quæ in Orbem  
à Te redundat Polonum, spectatores uti a-  
vidos, sic lætissimos. Omnium oculos ora-  
vultus, in Te conversos vides; intende cor-  
dium repagula, quæ in plausus, in festivos  
motus, Ascia Tua reserat. Panduntur Ho-*



nori triumphales portæ, omnes Te ad de-  
stinatum muneri Tuo locum gestientibus co-  
mitantur animis & mille panegyres ferunt;  
ego nonnisi minimus Palladis Cracianæ  
cultor audaciæ meæ arguor. Magna mo-  
limina tento, Icario more, tenuitatis con-  
sciis; illuc leviori pennâ ferri contendo;  
mox penas daturus, quò Tuus Bipennis e-  
volat Honor. Exiguus paginarum colu-  
mnis, ultra Herculeas metas: ultra Gadios  
diffusam recessus Domus Tuæ ILLV-  
STRISSIMÆ famam tenere exambio; quis  
ausus? Oratorijs Gradationibus Magni-  
tudinem Tuam, quæ in totum Univerſi ex-  
crevit ambitum, metiri cupio; quis co-  
natus? Rumpuntur subtili acie ingenij Tui  
protensæ Schinotenes, Rhetorum auxeses  
& incrementa amplitudine Eiûs decre-  
ſcunt. Vile est omne verborum pondus A-  
ſciæ pretioso comparatum metallô: tenebro-  
ſa Tulliana lumina illiûs Phæbeo admo-  
ta ſplendori: cornuta dilemmata in ſolido a-  
cumine obtuſa. Pallescunt in hoc rubeo  
Campo Hortensiorum roſæ: Regina ani-  
morum Eloquentia, immortales locutura  
laudes, in purpura ſua cogitur erubeſce-  
re.



re. Non est tam sublime dicendi genus,  
quod attingat Magni Nominis Tui altitu-  
dinem: nulla tanta Oratoria superlatio,  
quæ ingentibus comparata meritis, humi-  
lior non sit. Exhaustitur Tullianum æ-  
quor, antequam ex illo, ad exarandas im-  
mensas dotes Tuas ampla volumina cha-  
racteres bibant. Deficiunt celeres erudito-  
rum pennæ, antequam alatam Tuæ Vir-  
tutis famam assequantur. Quò altiores Ho-  
norum conscendis gradus, acrius ingenia  
torques, & Oratores magis in stuporem du-  
cis, quam ut de Te facundius quidquam<sup>10</sup>  
enarrent. Quidquid sit; esse non poterit,  
quin dulces Gratie Domus Tuæ Illustris-  
simæ, & magni, quibus Maiores mei nu-  
triti, favores audaciorum reddant & alli-  
ciant, ut me inseram effusæ applaudenti-  
um turbæ, si non ad numerum, saltem ad  
omnimodam reverentiam laudator Tuus.  
Urget studiosum conatum Ascia, cui non  
novum est facundissimos efformare Mer-  
curios; si quæ incultò de Te exaravero sty-  
lò, expoliet. Tinnitus Eius, ære Corynthio  
suavior Musarum silentia rumpens, dum  
ad Cracij Parnassi rupes repercutitur.



Pneumata minus diserta suade vivaci-  
ori animabit spiritu. Acies nitens mem-  
bris periodorum, incisus Oratorijs novam  
inducet formam & acumina dabit. Am-  
plam dicendi materiem applaudentis Pa-  
latinatus Campi, lumen Sidera, argutio-  
res calamos Poloniae Urbisq; Aquilae sub-  
ministrabunt. Hic ipse Tuus qui sibi ima-  
ginem dante Ascia pennas adstruit, ut in  
altum, applaudens Tibi, feratur Honor, me  
minimam atomum ex arena Palladis ex-  
citando, inter sui Phæbei splendoris trans-  
parentes radios liberiùs discurrere patietur.  
Totum id erit de munere Tuo; ergo dum pu-  
blicis omnium votis & utraq; Aquila ex-  
pansis alis ad plausum concitante Capita-  
nealis dignitatis conscendis culmen, ut, læ-  
titiae interpres, imperfecto quanquam ar-  
tificio adumbrem Poloniae felicitatis ideam,  
in qua BIPENNIS IN ALTO SVI HO-  
NORIS ASCIA eminebit, permittas.

Eluctari ad sublimia & in summis emi-  
nere fastigijs ut eò securiùs magnanimis  
Candidatorum ausibus contingat, alteram  
virtutum pennam: rectefactorum alteram  
adstruat sibi honor, necesse. Instabile est,  
quod



quod erigit non sola virtus: quod non  
meritorum pondus in lance æquitatis attol-  
lit, periculosum. Audeant conatus teme-  
rary vel inconstantis Deæ levioribus in-  
structi pennis: vel inani ambitionis excita-  
ti vento in altum tolli, ut nullò suffulti il-  
lustrum operum adiutorio, casu graviore  
ruant. Stimulet Phætontes miseros præ-  
ceps & vesanus tumor, non tam flammis  
Piroentibus, quam innata levitate in  
sublime vehi, ut nimia regnandi cupidine  
accensi, Orbem incendant, ardoremq; su-  
um in altifono ingurgitantes Pado, miti-  
gent. Concitet ardens studium inconsultos  
Icaros contra naturam ad volandum; ut  
non sine indicio penitentis fastus, cum ce-  
reis in lachrymas liquescant alis & inter  
Ponti amaros fluctus temeritatem defleant.  
Tantum est Prænestini Numinis ingeni-  
um: hic tumidæ ambitionis eventus: hoc  
rerum commune fatum; ut dignitates indi-  
gni rapiant, non servaturi. Bipennes quan-  
quam sint, qui alta petunt; sed si non aquil-  
larum more ut solis radios, intuentur  
virtutem; mox angulos & tenebras, unde  
evolarunt, splendoris impatientes majestu-



si, repetunt vespertiliones. Testudines licet ad honorem plurimi proprijs emergendi viribus incapaces; si avidius tamen alienis implicantur pennis, sæpe in auras ab eludentibus portitoribus dimissi, antequam volare discant, celerius, immemores tarditatis suæ, feruntur ad ima, periculorum scopulis allidendi. O curas hominum! o quantum est in rebus inane! Nunquam in solido stetit ambitiosus honor, nunquam diu felix; ipsa nefandi sceleris mole etiam Clavo imperij affixus corrui. Non Tarquinius superbos iuvat per damna, per cedes ad Tarpeiam eluctari sedem, si locum temerantes, virtuti debitum, eodem cruore, quem dominandi cupido fundit, cum ambitu Regio proscribantur. Non Sejanis prodest populari ab aura & plausibili clamore in altum ferri, si gloria iniquis parata fraudibus, totaq; rerum potestas ab infami unco pendeat. Evanescent cum fatu-  
is ignibus tumidi fastu Nerones, quos Urbis incendia, his tantum operibus illustres, supra Quirinos colles fumigante fama elevant. Pereunt ut muscæ hostes muscarum Domitiani, quos ad honores Divinos  
hæ



hæ nonnisi nigricantes animæ, hæc agmina  
volitantia strepentibus alis extollunt. So-  
la virtus perpetuum sibi in altis culminibus  
condit ævum: sola repulsæ nescia honori-  
bus fulget intaminatis. Carissima hæc De-  
orum progenies, Heroum comes & socia,  
ut immortalis gloriæ capax; sic ultima mi-  
nimè veretur donari sede. Ministra hæc  
Supremi Iovis coronarum dispensatrix est;  
quotquot Insignia honoribus offert, tot ar-  
rabones perennitatis præsentat. Imponit  
orbes Atlantibus Regnorum coronarios,  
nunquam desitura præbens virtuosorum  
in Vniverso documenta famæ. Aureis ma-  
nus operatrices laudabilium fatigat sce-  
ptris; divisum cum Iove imperium Augu-  
stis Heroibus tribuens. Culmina digni-  
tatum, alta subsellia erigit, solidam quibus  
materiam dederunt merita, ipsa formam  
& maiestatem induxit; jam honor Prin-  
ceps esto. Offert Scipionibus Clavas, Bru-  
tis Fasces, Curules Fabijs; ut vel his  
gradibûs & fulcris securiores majora pe-  
tant. Parum est, quotquot volumina re-  
voluunt sæcula: quotquot liquidū duratura  
in ævum velociores calami exarant folia:



quot ora Virorum: quot Oratorum lin-  
guas in sui panegyres virtus & recte facta  
merentur, tot pennas habent, quibus instru-  
ctus honor in altum semper evolat. BIPEN-  
NIS est in Alto Honoris Tui Ascia, Illustrissi-  
me Domine, quam in Tuo ingressu votis  
Procerum & vocibus jubilantium animas,  
ut in plausum Tibi assumat pennas & vo-  
let. Quidni applaudat? quidni in altum  
feratur? cui magna virtus & sublimis non  
elatus animus Tuus addit alas. Incremen-  
tum habet pennarum Ascia vel ex ipso No-  
minis Tui ethymo; quod, ubi accrescentem  
explicat, jam Te maximum monstrat.  
Multi sunt, qui sola nomina jactant, aut  
à Saxeæ Deucalionis gleba derivatum san-  
guinem; Tu nihil valere nomina sine ge-  
stis: nullam esse noveris magnitudinem si-  
ne virtute, sed tumorem. Non ab Olympo  
nomen impositum, Dijs æquat; sed meri-  
ta sideribus coronanda. Qui monstra do-  
mat, Hercules est; inter astra referri di-  
gnus: qui nunquam ferro nudus, Achilles  
non ab Homero tantum laudandus: qui  
agit Scipioni æquanda, in numerum semi-  
deorum computari debet. Fumosa lux,  
que



quæ à solis Majorum Ceris erumpit: lu-  
bricum frigidumq; encomium, quod mar-  
mora præstant; quæ à virtute simul: quæ  
ab egregijs facinoribus veniunt, admiran-  
da sunt & excelsa. Iungis utrumq; Abo-  
riginibus Illustrissimis ex utroq; Cæsar,  
virtutum & meritorum pennis sublimia  
petens, non ut videaris, sed ut sis. Agis,  
quæ operatur Ascia Tua; cuius natus  
splendor quanquam totum diffundatur in  
Orbem; fulgoribus tamen virtutum radi-  
are, meritis in Heroibus augeri, grande-  
scere in Proceribus, altius ut eminere, sic  
Patriæ prodesse ambit. Ambitus hic Do-  
mus Tuæ Illustrissimæ, magnanimæ dexte-  
ritatis & publici amoris præsefert docu-  
menta; ideo casum non novit. In Alto sem-  
per majestas ejus generoso sanguine pur-  
purascens, quò vetustior, eò venustior. Cla-  
ritudo plusquam Phæbea indeficiens; cu-  
jus originem an meridiem in ortu suo ve-  
nerator dum meditatur calamus, cum Sar-  
maticis Aquilis ad prima nascentis Po-  
loniæ sese demittit incunabula. Audet ni-  
mium penna, quod Ausoniæ timuerunt  
gentes, fulgorem Ascix Fascibus involutæ



reverenti oculo adorando. Audet, inquam;  
sed corā Cano consurgens STARZA, quā  
sit Afcia heroicis antiqua gestis, quā ve-  
tusta meritis, in paginarum tabellis ve-  
ram imaginem hebeti quanquam acumi-  
ne suo repræsentat. Amat quidem tem-  
porum processus mutationis vices, jam hæc,  
iam alia nomina rebus imponens; auget ta-  
men non minuit gloriam, quam mille titu-  
lis dignam orbi commendat. Attollit nunc  
vox plausibilis Capitoli, Arcem, quæ Tar-  
peia erat, & Latij non ignobilem locum  
celsior Romana supplet potestas. Hoc tem-  
porum decursu, quos cognomine vocamus  
TENCZYNIOS, jam Illos in OSSOLINIIS ado-  
ramus. Quantorum Illi recte factorum  
documenta dedere Viri: quibus fulsere ho-  
noribus, Fascibus floruerè quibus; post tot  
revoluta secula, ut magni Nominis veri  
heredes OSSOLINII, sic dignitatis eundem  
servant tenorem. Communem rebus Nu-  
mina crescendi posuere modum, ut à minu-  
ta semente per incognitū augmentum quæ-  
vis in altum assurgat moles. Ipsa rerum  
parens natura ex parvis principiis com-  
positum, ex atomis continuum esse volu-  
it.



it. Magnum est ex magnis nasci. & illam  
sui originem habere, quæ parvitatem non  
novit. Sat nobile generis principium, inde  
lineam Familiæ ducere, ubi non exigua  
puncta, sed grandes Nominum caracte-  
res & vasta heroum simulacra spectantur.  
Satis illustris ortus, si ex Parente sole, so-  
les oriri contingat. Ex vulgo in Eque-  
strem Ordinem, inde in Patritium & in  
Senatorium communis alijs processus da-  
tur: OSSOLINII in Domo Patritia na-  
ti congenita semper habuerunt laticlaviam.  
Non purpuras unquam alieno quæsive-  
runt ab Ostro, quibus illorum rubuit san-  
guis: non sellas curules, quas domestica  
struxerat pridem Ascia. Evolvantur Po-  
loniæ fasti, ut quod longa involuunt se-  
cula, Aristocraticum duodecim Palatino-  
rum emineat regimen. Non dum Po-  
lonus Orbis sanctas adoraverat leges: non  
dum suis cardinibus immotus stetit; dum  
titubabat & studia, libertati favens, in con-  
traria scinditur: an ab uno regi? an plu-  
ribus subesse conveniat? post fata nunquam  
deslenda Lechi Parentis, à cujus tantis-  
per arbitrio pendeat, Clavum imperij se-



lectissimis commendat Viris. Eminent hic  
inter tot Regni Proceres unus ex TOPORE-  
IS, Vir tantæ dexteritatis, ut mireris Bi-  
pennem Asciam, cum in commune malum  
undiq; conspiratum foret, stabiliendis rebus  
Poloniæ suffecisse. Radici malorum ad-  
movetur Bipennis, ut Patriæ bonum flo-  
reat: exciduntur obices, ut optata felicitas  
Regnum subintret. Verte, qua parte ve-  
lis, geminum Decus: hinc terrore hostis:  
illinc splendore discors incola percellitur, qui-  
escit à motibus. Ipsa Respublica, sic am-  
putatis periculorum stolonibus in eam suc-  
crevit, quam hodie videmus, gentibus in  
stuporem, Regnis in consortium amulan-  
di. Securius in hac septentrionis ora gens  
peregrina cum sedem fixerit, extendit ma-  
jestatem: cum sola in silvis viveret, solium  
Regibus, Curules Patribus, Equitibus glo-  
riæ fabricavit trophæa: quo instrumentò?  
Ascia: quibus Authoribus? procul dubio  
TOPOREIS. Rebus Patriæ succurrere la-  
psis aut impendentes ruinas prævidere, ne-  
gotium sibi planè impositum Domus Am-  
plissima credidit. Ne otiosa rubigine con-  
sumeretur Ascia, illam non evanido splen-  
do-



dori, sed commodo publico polivit, exercuit. Hinc ereclam cerne Bipennem jam jam ad opus promptam & ad laborem plusquam Dædaleum paratissimam. Gentium Septentrionalium Augustal Polonia, liberæ gentis magnifica ades, basilicum semideorum, nam Heroum opus, non servilis indolis sed libertatis adamatum triclinium, quidquid solidi ad perenne decus, quidquid splendoris ad gloriam, industrij ad stuporem præsentat: id curæ STARZARVM, labori TOPOREORVM adscribendum censet. Viderunt Principes & Reges Polonia Serenissimi tantorum Virorum dexteritatem, qui amore Patriæ flagrant in officina pectorum suorum exactius quam in Vulcani Lipara fabrefactis telis contra impetus quosuis certabant strenuissime. Potuit BOLESLAUS CHROBRIVS in signum devictarum gentium, debellatorum hostium, victrices erigere columnas: potuit KRIVOVSTVS quadraginta & amplius reportare trophæa, quibus Asciata Sethegorum virtus animos viresq; dedit. Patuerunt Victoribus Polonis exterarum Urbium portæ, iuerunt Provinciæ in spolia.



integræ gentes in triumphum cessere. Gra-  
ves audaci quoq; Gradivo de hac stirpe Vi-  
ri; cum in arenam & in Martialem prodi-  
rent campum, quot corpora, tot exscinde-  
bant laurus: mactabant hostes in Patriæ  
victimam, latius cædem, latissimè terro-  
rem sui protendendo. Ad ipsam tantorum  
Heroum famam ad sparsum imminentis  
virtutis rumorem vinctas manus dede-  
runt hostes, antequam vincerentur; cedere  
Victoribus alachriores quàm cedi expe-  
ctarent. Hæc solùm magnorum injuria Vi-  
rorum, quòd fastis careant eorum facta  
adamantine memoriæ mandanda: quod  
aureis, quæ stuporem inducunt, non im-  
primantur characteribus opera, vel quòd  
integra non sufficiant volumina notan-  
dis. Sufficit NAVOGIVS in PREGINIA  
COMES, qui cæterorum involuat No-  
mina, virtutumq; Eorum magnus sit vin-  
dex & index; à quo ILLVSTRISSIMA  
OSSOLINIORVM FAMILIA in decus  
& solatium Orbis fausto fidere BIPEN-  
NIS evolavit. Socium cujusvis honoris  
dixerim, quem Comitem veneror: ad ma-  
gna natum; magnorum Candidatos hono-  
rum



rum qui progeniuit. Semideorum Paren-  
tem nominaverim, qua de stirpe nasci, nec  
Ioves ad regimen, nec Mercurij ad eloqui-  
um recusarent. Ars ne vel natura sua no-  
bilius efficiat opera? decidant alij, huic  
progenuisse celeberrimos ad gloriam suf-  
ficit, prodest ad argumentum perennaturæ  
laudis. ANDREA Filio quantum emi-  
neat Senatoria Palatini Cracoviensis,  
quam occupavit, Curulis: quantum in su-  
blime feratur, gloria major declaret. Non  
fortunarum solum per bona TENCZYN,  
cognominis etiam facultatem natus. Bi-  
penne Domus Insigne dum animo lu-  
strat ANDREAS, vetusto STARZONVM  
Nomini novum addit. Meretur multiplex  
virtus non una publicari voce & fama  
sui, prepetibus quæ volat alis, novis instru-  
cta pennis, ipsum gloriæ attingat O-  
lympum, necesse. Evolastis jam Sarmati-  
cæ Aquilæ pulli in lucem publicam, in me-  
ridie honorum stetistis, Majestatum soles  
irretortâ spectantes pupillâ, vestram non  
in dubium vocastis perspicaciam. Et quis  
Oriens Vestros non vidit splendores? quis  
Occidens in fulguranti non occubuit ju-



bare? qui septemtrio Martialium animo-  
rum ardore non incaluit? Regum devin-  
cere corda, Caesarum ad vota sua incli-  
nare mentes nemo melius novit, quàm  
Vestrum in illos merita & officia, quæ su-  
erant exactissima. Res Phæbo evidentior,  
ubi IOANNES & ANDREAS COMI-  
TES à TENCZYN in ea honorum stete-  
runt auge, ut, intimis Regum favoribus  
allecti, ad Augusta eorum solia Senatorias  
admovent Curules CASTELLANI  
CRACOVIANSES ambo. Grande decus  
inter magnos Regni Proceres primas oc-  
cupare sedes. Dijs æquale munus, saluta-  
ribus Reipublicæ prodesse votis. Oracula  
consiliorum dare, bipenni acumine intri-  
catis rerum resolvere nodos, primis Po-  
loniæ Senatoribus concessum, eò felicius  
quò majori comparatum virtute. Invi-  
deant Patriæ extræ gentes, Orthodoxæ  
Fidei reverentiam, an æmulentur potius.  
Alibi solum Aris, hîc & Senatui admo-  
ventur Præsules. Animarum nonnisi,  
quibus credita cura, speculatores alibi; hîc  
sunt & populi Consultores. Venerandi  
Antislites, Regni Primates, Reipublicæ  
mu



muneribus incumbunt, ut Divinae sic Regiae Majestati addictissimi. In hoc Primalis eminentiae gradu viderunt sua tempora STEPHANVM COMITEM à TENCZYN ARCHIEPISCOPUM GNESNENSEM, cujus Nomini & primae sacrorum in Regno Potestati coronarius non deerat fulgor. STEPHANVS ipse fuerat, alijs impone- re potuerat stephanomata. Felicem se & meliori sorte beatam credidit VLADI- SLAVIENSIS Tiara, quae MATTHIAE de TENCZYN incubuit, sub cujus Episco- pali Asciato rigore & dignitate Senatori- a multi ad iustitiam: ad conservandas e- ruditi leges. Suffecerat pluribus muneri- bus unica virtus, multiplicatum pondus. Vir unà ferebat & distinctorum officiorum ratio uni animo sed magnanimo incumbe- bat. BIPENNEM Domus istius Asciam pluribus admotam operibus mirentur illi, quorum vel unicum agendi conamen per- dit operam, factaq; sua detrimentum senti- unt. Altiùs hæc, altiùs evolat BIPEN- NIS, tanquam uno consummato opere ge- stiat, ad alterum separatam monstret; & si quid offeratur struendum, ictus & qui-

F2

dem



dem ab alto ferat præsentissimos. Res nobis bellica cum Porta Ottomanica venit; perfringenda fuerat hæc janua periculorum, malorum ostium à Patria evertendum. Non deerant bellicæ Polonis machinæ nec arietes validi; quibus tamen barbara potentia repressalia dedisset, nisi BIPENNEM timeret. Saguntum fortè dolabris eversum meminerat; parem infortunij aleam ab Ascia Nostra noluit expectare. Nempe STANISLAUS à TENCZYN DVX EXERCITVVM, ut contra Turcicum processit Martem, heroicò gladiò ferijt barbariem, & ne majora auderet, furori timorem Asciam intentavit. Cessit à Regno regnorum strages, à nostro septemtrione Oriens, à nostris Domibus Urbibusq; Porta, imò à tota Europa robur resiliyt Asiaticum. Miretur motrix cruentorum certaminum Bellona, quomodo contra chalybeas vires prævaleat Ascia? contra instructas acies acumen gerat BIPENNIS? quomodo contra hostilium armorum minantia tela ipsa telum triumphale sit? Iactet suas industria Gradivi balistas, extollat reboantia tormenta, plumbeas glandes pyrio succensas igne præsen-



sentet. Suffragia hæc & facilia, victoria,  
modi cædium, fundendi media sanguinis,  
pernities tamen istis paratur, fata accele-  
rant, densantur funera. Solâ Afcîâ salus  
& integritas viget, firmantur vires &  
latioris vitæ organa civibus construuntur.

Virtus inflammata semel nescit mite-  
scere, accendit Heroum animos, et quò pro-  
pagatur magis, ad maiores ausus concitat.  
Transfusa hæc de Comitibus suis in OS-  
SOLINIOS animavit NICOLAVM  
OSSOLINSKI Castellanium Visliciensem  
adeò, ut, & hostes, pro Regibus certando,  
vinceret audaciùs & affectus vinciret Re-  
gum. Frenanda erat licentia Russo-  
rum, coercendi dissolutorum mores, gen-  
tis sædisfragæ sedanda rebellio; quid vale-  
rent humeri, quid vires OSSOLINIO.  
RVM? seditiosum domando populum,  
Regi victricem offerendo lauream, Vir  
dexterrimus docuit. Majora ausus favore  
Principum & gloria sibi adiiciente calcar;  
quantum Iagellonico ad Dabrovnâ pro-  
fuerit triumpho, victæ Prussorum manus,  
quas victi Regiæ potestati ad Coronoviam  
cum coronis dederant, documenta præbent.



Nec tanto Parente minor virtute Fili-  
us; ultra Polonos processit limites, alium  
sibi gloria, quàm Sarmaticum jam imple-  
verat, quæsiturus Orbem. Invenit AN-  
DREAS OSSOLINSKI Castellanus Vi-  
sliciensis quod optaverat in alieno Orbe:  
tot panegyres laudum suarum, quot ora-  
cula de se SIGISMUNDI Cæsaris Vir  
bellicosus audiit. Laudari meruit Impe-  
ratoris ore, qui fortunatam Cæsaris vi-  
ctoriam per innumeras bellorum procellas  
vexit. Alcide comparari debuit, qui  
Herculeis viribus tot immania superavit  
monstra. Et verborum & armorum e-  
nergiam, vim oris & operis, dictorum &  
factorum virtutem vidit & audiit suò  
avô Polonia NICOLAI OSSOLINII  
Castellani Woynicensis. Consus in consi-  
lijs, Mars in armis; utroq; stylo mala  
Patriæ ferijt, utroq; Patriam, qua ni-  
hil unquam charius habuit, delectavit. Al-  
lusit Gentilitiæ BIPENNI optimè, dum  
qualis & quantus requireretur, talem se  
exhibuit, monstravit, gessit. Formandæ Re-  
giæ Indoli VLADISLAI III, non aliun-  
de, quàm ex OSSOLINIA Domo quæ-  
situs



situs erat & inventus IOANNES OS-  
SOLINSKI Castellanus Radomiensis pro  
tenero Rege & nondum Sceptrorum capaci  
Poloniæ totius Gubernator. Supplebat  
Regis nondum adultos annos maturò  
consiliò; utq; res Patriæ unà cum Re-  
gnante crevissent, erudita, quæ suffice-  
rent, incrementa dabat. Præcursor erat  
IOANNES Majestatis Regiæ, cuius opti-  
ma educatio ad Polonum & Vngaricum  
Solum, quanquam in spem unius foveba-  
tur, deduxit VLADISLAVM. Quid-  
quid non sinistrè VLADISLAVS egit,  
directricis dexteræ opus existima: quidquid  
bene, in virtute eum gessisse moderatoris  
optimi, crede. Quantum commodi laben-  
tem exigere Patriam, tantum gloriæ ali-  
enis succurrere iacturis, OSSOLINIA-  
NA monstravit BIPENNIS, quæ in sub-  
sidium IOANNI Medices Hetruriæ Du-  
ci ex Polonia in Italiam evolavit. Ne-  
scia intervalli HIERONIMI OSSOLIN-  
SKI virtus Senensi bello adsuit, in quo vix  
ille Martis rudimenta miratus, iam A-  
chillem egit. Miles exteris exercitatus ar-  
mis in Heroem Polonum evasit: nunquam



exuerat Sagum; ter repetitam induit Togam. Sandecensis primò, mox Woynicensis tandem Sandomiriensis Castellanus. Magnus hîc honorum concursus ac ingens dignitatum in unum conspiratio. Cumulari tamen tanta decora debebant, quæ evincebat agendi dexteritas. Diserta sunt pro Domo sua merita, tacendo quoq; suadent. Cynea facundior virtus; ille Vrbes, hæc attrahit honores & convincit. Successit in eundem Senatus locum Parenti Filius MARTINVS OSSOLINSKI Castellanus Sandomiriensis. Par Genitori honore nec impar egregijs facinoribus. Rebelle STEPHANO BATHOREO & Polonie Dantiscum, ad mare sita Civitas assuavit bello. Neptuni Tethiosq; socia Martem provocaverat Nostrum; quam Ceres Polona nutrit, ausa est altricem suam fluctibus obruere incommodorum. Confluxit Polonia vel cum suo Vistula tantos ut extingueret bellorum æstus: turbatores pacis unius Emporij Cives ut compesceret. Volavit eò cum Polonis Aquilis BIPENNIS, temerarios ausus terruit, sedavit, in obsequium Reipublicæ populum sedi-



*seditiosum traxit. Motibus domesticis nil deterius, nil Civibus periculosius, quam suis perire armis. Tranquilla fruendo ab extra pace, internis obire bellis, nefandum est. Illum ego Alexandris Orbis victoribus aut Iulys in omni acie dexterioribus præposuero, qui tantis noverit mederi malis. Aperto Marte hostem ferire, tela telis, clypeos clypejs opponere, non tam arduum; sed animos unire malè concordēs, privata inter Cæsarem & Pompeium extinguere odia, cognatasq; dissipare acies, hic labor: hoc opus est.* ZBIGNEVS OSSO-LINSKI Palatinus Sandomiriensis fuerat Ille, qui excitatos REGNANTE SIGISMUNDO civiles motus, vesanumq; furorem populi rarâ prudentiâ et saniori dùm sedavit consilio, vicit. Tribus Filijs multoties felix, quos in salutem Patriæ ediderat: CHRISTOPHORVM ad Palatinam Sandomiriensem Curulem, MAXIMILIANVM ad Curia Regni Thesaurum, GEORGIVM Regni Regumq; annulo desponsavit. Atlantem Orbis Poloni dixerim CHRISTOPHORVM OSSO-LINSKI Palatinum Sandomiriensem, qui



*stimulô BIPENNIS Ascix Sux vel ideò se  
rebatur in altum, ut quos Iove, aut Apol-  
line natos noverit, Augustis præsenteret  
Majestatibus: quos iniqua deprimeret for-  
tuna. Ille erigeret; sic Nobilium Patronus,  
afflictorum Parens, Legum Custos, Pa-  
triæ optimus Civis dicendus. Iam jam in-  
ter molestos bellorum ventos tempestatesq;  
sonoras Reipublicæ Polonæ fluctuabat Na-  
vis: jam ab Oriente Osmano Turca-  
rum Duce in perniciem tendente, expecta-  
batur Occidens, ni dexterrimus Heros ful-  
gurantibus armis Meridiem Orbi Sar-  
matico accenderet serenum. In spes maxi-  
mas erigebatur Polonia MAXIMILIA-  
NVM OSSOLINSKI Palatinum San-  
domiriensem suis intentum curis veneran-  
do. Aureas credebat sibi rediisse horas sub  
tanto Thesaurario Curix; cuius vel ca-  
rissima Pignora pretium adaugebant. In  
IOANNE OSSOLINSKI Equite Meliten-  
si dulces eminebant Gratix: in STANI-  
SLAO Abbate Koprzywnicensi perennes  
Orbi Lechico adstabant laudes. Effundat  
hic Rhetoricos Tullius Cracianus fontes,  
totam Jagellonicam messem in calamos con-  
ver-*



vertat Oratorios; omnium animetur spiritu: omnium eloquentium Virorum loquatur lingvis, ut præcipuo literarum Fautori, literatorum Cultori, pro Domo Regiæ Palladis Pericli disertissimo, quod pusillus nequit exarare calamus, mille Panegyres ferat. Admirata quondam suos Tullios, Catones Roma; stupuit GEORGIVM: ad Hortensiorum floruit præsentiam; re floruit ad vernantem sacundiam OSSOLINII. Mittitur GEORGIVS, VLADISLAI IV imago, Romam, urbanissimæ svadæ ad VRBANVM VIII Legatus: quantum in sui amorem tam magnifico splendore, quàm eloquiò Urbem Urbem flexerit, loquatur Capitolium: loquatur Vaticana Sedes, quæ dum VLADISLAI iucundo aspectu satiari non posset, in OSSOLINIO vidit VLADISLAVM Regem, & purpuram ejus venerata est. Eadem gravitate Venetos adiit: eodem ore magnum Regis affectum ferente, FERDINANDVM Cæsarem allocutus; ubiq; plausus: ubiq; memoriam consecutus perennem. Omnis prudentiæ & eloquentiæ absoluta Ilias erat; annulò Regni, qui Mu-



*sæum cum Apolline in se clauderet, signa-  
ri debuit. Majores sui inter Sacri Roma-  
ni Imperij Comites, hic inter Principes  
annumeratus; splendore generis, suavita-  
te oris agendorum dexteritate, consilio-  
rum efficaciam semper Princeps OSSO-  
LINIVS.*

*Fastis inclusi perennibus, quotquot  
Magni prodire Viri, Cere Tue sunt Il-  
lustrissime Domine; quæ in plausum Tu-  
um inflectantur; fumosæ Imagines, quæ  
vel excusso pulvere addant Tuo ingressui  
magnificentiam. Ex alijs promicat He-  
ros animus, splendet in alijs authoritas,  
rosas alijs promere videntur, quanquam  
fileant. Mortui ad vivum Tui: & si frons  
fronti Tue, gestus gestui comparentur, in  
Te spectantur OSSOLINII. Redit nobis  
per Te species altioribus digna honoribus Il-  
lustrissimi ZBIGNEI OSSOLINSKI Capita-  
nei Drohicensis Proavi Tui; cuius per dius  
& pernox in votis ei circa bonum commune  
labor: continua sollicitudo, quomodo pro-  
desset Patriæ: quomodo vires animumq; mo-  
resq; aureos educeret in astra. Tantum Mil-  
ciadem non unius Themistoclis excitarunt*

*tro-*



trophæa. Alcida hunc nullus Antheus  
superavit: nulla terruit hydra: nulla  
succubuisse fecerunt adversa. Infractus Vi-  
ro animus, pectus Heroi ferreum; toties  
periculis obiectum, quoties amor civium  
& ingens negotium urgebat. MAXIMI-  
LIANVS OSSOLINSKI Venator Pod-  
lachiaë Avus Tuus maxima nomine com-  
prehendit, majora virtute. Quandoq;  
quod nos magnitudinem dicimus, tumor  
est; hic summis assuefactus animus, ma-  
gna etiam, parva iudicat. & quidquid ma-  
ximo additur, exiguum aestimat. Quot-  
quot consilijs Fabios, Scipiones fortitudine,  
felicitate Policrates, vidit ILLVSTRISSIMA  
DOMVS, omnium dotes Vni consedissee Viro.  
res gestæ docent. Non erat acies: non erat  
Martialis campus, in quo non meteret laure-  
as cum triumpho, et copiosam gloriæ non col-  
ligeret messem. Bona consilia noverat Rei-  
publicæ animam esse; his continuo intentus,  
tàm in publico quàm in privato oracula  
consiliorum pandens, languentem anima-  
vit Patriam & placida populos in pace  
tenuit. Comitij Regni quoties aderat,  
toties aureis verborum retibus sensus ma-



turos consulentium in propriam trahendo sententiam, salutaria rebus media venatus est Venator Illustrissimus. Honores nisi, quos meruit maximos, venari noluit; quanquam fugientem sequentes tanquam in casses ibant. Meritorum pondus iustam quidem appendit lancem, ut Senatus Patrem in altum tolleret, sed magnorum capax bonorum OSSOLINIVS esse maluit, quam videri; & Sago & Toga, & pace & bello, & armis & amoribus populi Heros insignis.

Fortes creantur fortibus, bonis optimi, magnis maximi; Majoribus suis Maximiliani. Imago vera Progenitoris sui, nec nomine tantum FRANCISCVS MAXIMILIANVS OSSOLINSKI SVPREMVS REGNI THESAVRARIVS PARENS TVVS; Cuius quilibet progressus in omnigena virtutis perfectione summus. Musis primam consecravit aetatem, ut se genuinum Aquilæ Pullum ad Phæbi eruditi radios probaret: ad Parnassios colles magnitudinem videret propriam: in Fontibus scientiarum limpidissimis Cerrarum suarum spectaret pulchritudinem.

Stu-



*Stupuit olim Celsissimus Princeps Illustrissimus Reverendissimus GEORGIUS ALBRACHTVS DENHOFF Episcopus Cracoviensis, Dux Severiæ, in tenera Illius ætate tantam indolis maturitatem; dum oracula panderet, ut Apollo: loqueretur ut Princeps Oratorum Tullius: rerum causas discuteret ut Aristoteles: vastitate ingenij Orbis Regionumq; complecteretur imagines, ut Ptolomæus aut Euclides; totus in literas Iagellonicas quibus navabat operam, ut animò, sic favoribus effusus. Soles externos vidit, non ut inde rediret illustrior, suis splendoribus Illustrissimus; sed exotica primæ magnitudinis sidera ut ab hoc Sarmatici Poli Luminari Magno nobilius mutuarentur lumen. Placuit Regia Phæbi Poloni in cubilibus luminum nato, accessit; elegantiam, experientiam, gravitatem, nec Romanis parem Catonibus, aut Macedonibus Græcis, Cæsaribusque, dexteritatem tulit: meritò favorum radijs, jubare benevolentie imò affectibus ipsis circumfusus Serenissimis. Quidquid in Augusta arcanum mente, tanto Ephesioni patet: quidquid vel in toto pretiosum Re-*



gno, Illi conceditur, clavibus Ejus rese-  
randum. Aperuit quoties Polonus Mars  
præliorum aciem, sub hoc fideli Terræ  
Drohicensis Vexillifero triumphavit sem-  
per. Diva Themis Regni Supremo Re-  
genti quoties causarum pondus Legumq;  
pretia trutinanda reliquit, iustissimum re-  
rum Arbitrum deprehendit, stupuit, lau-  
davit. Æternùm servant sub pectore, gra-  
taq; mente revolvunt Comitia Regni Ge-  
neralia illam prudentiam, illam stupen-  
dam, quæ nec Arpinatico funderetur ab  
ore, eloquentiam, si quando Legatum aut  
Mareschalcum egit. Nemo melius Nobi-  
litis Conventus fluxibus & refluxibus  
animorum turbidos eo iudicio, ea suavi-  
tate oris sedavit: nemo facilius authori-  
tate dictorum & rationum pondere incli-  
navit: nemo efficacius, quàm hic Modera-  
tor verbis ut nummis, plusquam aureo  
Gallicani Herculis torque, in partes me-  
liores traxit. Decuit, ut, qui non tan-  
tum circa Regis Curiam sollicitus; verùm  
totius Regni curarum tolerare molem sa-  
ud aliquando recusat: qui bono communi  
innumeros dexteritate sua proventus au-  
get,



get, Thesauro Regni præficeretur æstima-  
tissimus Thesaurarius. Reddit Ille, quæ  
sibi optat Polonia, aurea Saturni sæcu-  
la: inducit argenteam ætatem, quam sub  
tanto Thesaurario pretiosam spirat. Quæ  
olim cum tot gentibus solò nonnisi certa-  
vit ferrò, nunc diuitem colligit censum,  
opes opibus accumulans, etiam illas The-  
saurò æmulatura. Aperit hæc Aurea  
Clavis, animorum Victori commissa, o-  
mnis felicitatis ianuam, ipsum augustal for-  
tunæ reseat. Robustiores opponit artus  
Lechicus Mars, belli solidatus neruò, ma-  
jorem incutit terrorem hosti & armis &  
aurò pugnans. Bellatrices Aquilæ in Ni-  
do aureo facile nidificant. Redit prima  
Polonorum magnanimitas, qui domi suam  
liberaliorem Traianum, munificentiorẽ  
Vespasianum spectantes, ad arma parati  
aurum auro adiiciunt, & vanam opum  
alienarum iactantiam confundunt.

Adaugent Regni Thesaurum, multi-  
plicant Patriæ felicitatem, Honori Tuo  
splendorem addunt Domûs Cimelia, Ma-  
gna Virorum Nomina, Illustrissimi PA-  
TRUI Tui. CASIMIRVS OSSOLINSKI



Castellanus Czechoviensis, ut candorem animo, sic ore gemmas & lilia depromit; candida sedato rerum turbine liberae Gentis inducens tempora. MICHAEL OSSOLINSKI Subdapifer Drohicensis altero virtutum, altero meritorum pondere iustissimam fatigans lancem, BIPENNEM reddit honorem, ut in sublime volet. IOANNES OSSOLINSKI Capitaneus Drohicensis eum se Reipublicae Civem, illum Patriae Patrem demonstrat, quo rarus assurgit gratiosior. Decessit quidem satis, cum Tu procedis honoribus, Illustrissimus GEORGIUS OSSOLINSKI Castellanus Zawichostensis: obiit Perillustris & Reverendissimus CASIMIRUS OSSOLINSKI Canonicus Cracoviensis sui Vavelli Corona, cum Tu ortum Honoris feliciter auspicas; utriusque tamen Patruum Tui in Te manens fama superstes, dignitati Tuae militat. IOSEPHUS OSSOLINSKI Dapifer Sandomiriensis ubi Te succrescentem videt praesenti Honore, gloriae incrementum addit pari Nomine & grandi meritorum numero Patriae pretium, felicitatem Regno, Tibi plausus accumulatur.

En.



*En quanta Superi Orbi Sarmatico pro-  
videre bona, quàm larga Deorum mu-  
nera è Domo OSSOLINIANA in Patriam  
redundant! Non poterat opulentior inve-  
niri thesaurus, majus Clenodium, quàm  
cæleste donum, quod THEODORA ex  
MŁODZIANOVIIIS, KRASSOVSCIIS OSSO-  
LINSKA Magni Parentis Tui Genitrix Il-  
lustrissima, in Ærario Regni reponendum  
edidit. Pignus id, arrabo est felicitatis Po-  
lonæ: pretium eò aestimandum magis, quò  
digniori prodijt de Scrinio; quò bonum pu-  
blicum abundantius quàm Attali opibus  
ditescit. Imò fortunam plusquam Cæsa-  
ris invexit Orbi Polono aurea Catharinæ  
rota, ubi Te Illustrissime CAPITANEE,  
Gemmam ex Erythræo materni emer-  
gentem sanguinis, Poloniæ; unde ditissi-  
ma aestimaretur, in lucem tulit Illustris-  
sima ex MIACZYNSCIIS CATHARINA OS-  
SOLINSKA Suprema Regni Thesaura-  
ria Genitrix Tua; in quam Dij suas Ida-  
lijs negatas Nymphis congesse dotes. Hæc  
quantarum sit Mater virtutum, ex Pa-  
rente Suo Palatino Volhyniæ, Hectore  
Polono; ex Te Filio imaginem ejus seren-*



te noscitur. Addit suis pretia muneribus.  
Illustrissima ex OSSOLINIIS EVA GIE-  
SZHAFOWA Succameraria Vendenſis,  
ſanguine Genitori Tuo Soror; quæ, ut  
vinculô amicitie magna nexuit Famili-  
arum decora; ſic prudentiâ, venuſtate,  
judiciô, virtutumq; fragrantiffimo odore  
omnes recreat & in cultum ſui vel in-  
vita provocat. Inſtat Poloniæ pretioſior  
ætas, eô candidior, quò Gentilitij Iunoſſæ  
vellere nitidior: eô felicior Tibi, quò Illu-  
triſſima ANNA ex OSSOLINIIS SZ A-  
NIAWSKA Soror Tua Germana, magna-  
nimitate Iuno, Pulcheria decore, provi-  
da mente Minerva, in Illa Domo præ-  
ſentior. Extendit aureum vellus ſuum  
in Te quoq; Celiſſimus SZANIAVIVS  
AGNVS, ut honoribus TVIS ex pretioſo ſta-  
mine texantur murices. Proſpicit ex Va-  
vello inter tot curas publicas: ut, qui in  
Domo Arietis morantur dignitatum So-  
les, etiam in Tua Illuſtriſſima Domo ſtati-  
onem figant.

Sed quid ampliùs meditatür penna?  
quid audent? quò eluctari prætendit? Ser-  
pebat hactenus circa margines, cùm va-  
ſtum



sum laudum Oceanum Domus Tuæ Il-  
lustrissimæ tranare non posset. Ibat ductri-  
cibus lineis, & atrâ sepiâ reptantes nota-  
bat gressus, ne in amplissimo elogiorum ab-  
erraret Campo. Erigebatur per pagina-  
rum columnas, altitudinem Tuam prospi-  
ciendo. Carpebat folia ex Arbore Con-  
sanguinitatis, ut vel his ornata ceram Te  
in decore suo compareret. BIPENNI Ascix  
alligari desiderabat, cujus acie securius im-  
mensum gloriæ secaret æquor, aut trium-  
phales Honori Tuo erigeret colossos, vel  
acumine ejus instructa altiùs in laudes Tu-  
as volaret. Pinxit, quibus potuit, um-  
bratilis suadæ coloribus Imagines Aborigi-  
num: incultò quanquam stylò Magna e-  
xaravit Nomina; jam tandem tot Hero-  
um grandi meritorū pondere depressa in Tu-  
is Illustrissimis Ceris hæsit. Quidni hæreat  
penna? cum tam faciles flecti advertat  
Ceras, ut omnem in se Tui recipiant for-  
mam. Dignosceris ex Avorum, Proavo-  
rum Atavorumq; Imaginibus, quis &  
quantus sis; Illi dignoscuntur ex Te, quo-  
rum es vera imago, os humerosq; omnibus  
simillimus. Non sunt Majorum Tuorum



dotes, quarum in Te, pulcherrima non  
pingas lineamenta: non est virtus, cujus i-  
deam non geras: non sunt merita, quo-  
rum in Te non transferas exemplaria.  
Terrestria Numina dixerim magna No-  
mina Avitæ Domus Tuæ; Pantheon eo-  
rum es, utq; Maximilianos adæques, No-  
mine & honoribus accrescis. Meruerunt  
Majores Tui Celsissimis insigniri titulis,  
altis eminere in subsellijs, pulchris mune-  
ribus donari; Tu similes occupas dignita-  
tum sedes, titulosq; plena sorte mereris; in  
quem cum sanguine Patrum transfusa  
virtus ultrò suis eminet laudibus, vastum  
capacemq; omnium donorum in Te relin-  
quit locum. A primo rubentis auroræ  
vultu pretiosas diei metimur horas: à se-  
reno evigilantis Phæbi risu, nullis um-  
brarum asperandarum rugis ominamur  
meridiem. Fasciata viridi involucro ro-  
sa futuram, qua explicetur, præsentat pur-  
puram. Gemma suæ inclusa conchæ regi-  
as, quas exornet, spirat coronas. Produnt  
Herculem infantiles cunæ, & quantus  
fuerit in Lerna hydræ domitor, iam elisis  
in fascia præludit serpentibus. Rugat su-  
per-



percilium pugio contra Romam Annibal,  
jam in molli ætate monstrat, quod sit Al-  
pes fracturus duras. Prima vite Tux au-  
rora alto sanguine rubens festiva dedit  
omina, qualis esses futurus: quàm lætas  
Te expectantibus laturus vices. Splendo-  
res Phæbei de Tuo erumpentes vultu futu-  
ræ præluxere magnitudini, mox meridi-  
em honorum accensuri. Fascijs involutus,  
dotes Tuas, quas non dum loqui poteras,  
jam fronte explicuisti: jam purpuram a-  
nimi & thronum characteres quidam na-  
turæ indicarunt. Spes de Te non vanas  
concupientium coronabas votis, ubi, ante-  
quam ætas pateretur, jam Te monstrabas  
magnum. Crevit Tecum indoles ætate ma-  
jor, quæ Illustrissimis semel accensa Ceris,  
ardebat semper illustrioribus occupari.  
Sprevit crepundia puerilia, solis Majo-  
rum delectata Imaginibus; ex grandævo  
eorum vultu maturitatem, ex gravi su-  
percilio maiestati: ex pulcherrima specie for-  
mam Priami dignam imperio & omnem  
elegantiam in Te transferendo. Ab Oce-  
ano sanguinis, ad fontes properasti Sapi-  
entiæ, quem ubi Iagellonica salutarunt



Musæ, ut plausum dedissent, Apollinem ad  
Citharam, Parnassios colles ad saltus,  
Hippocrenem, quæ suavi decurreret su-  
surro, concitarunt. Bibisti avidius illos  
scientiarum fontes, quos hauriendo Ma-  
jores Tui, dulcibus gratiarum fluentis co-  
piosius auxerunt. Ad illa Parnassi Aca-  
demici juga celerius movisti gressum, ad  
quæ BIPENNIS Ascia volavit semper, A-  
pollinares in victrices palmas scissura lau-  
rus. Regiæ Tibi, arbitrio Dulcissimi Pro-  
genitoris, placuerunt Musæ; ut posthac ad  
mentem Regum saperes. O quantum A-  
pollinis Musarumq; delictum eras! Vix  
in arenam eruditæ Palladis venisti, jam  
cordium & animorum triumphasti Victor.  
Non erat tam difficile quidquam: tam  
perplexum in scientiis, quod subtili inge-  
nio non perceperis, profundò judicio non  
penetraveris, omnia suaviter discens ac si  
congenitas artes haberes. Nullus erat in  
scholis cultor, qui Te imitari non studeret.  
Trabebas alios ad scholasticam diligentiam  
ligatò: aliorum animos ad ardua quæque  
solutò resolvebas eloquio; omnes ad æmu-  
lam concitabas virtutem; cum tamen o-  
mnes



mines generosa indole superaveris. Primum Tibi & maximum proficiendi auspici-  
cium erat in animo: coram Numine im-  
minui, pijsq; affectibus in superos ferri.  
Hinc quantum profeceris: quantum in  
flore ætatis fructum attuleris scientiarum,  
lingua Te prodit, ipse Tuus calamus par-  
cultissimis, gravis, solidus, eruditus, vel  
hodie id Orbi desert. Athenas jam vastò  
complexus animò, ut, quæ legisti, audivi-  
sti & alta reposuisti mente, in amplissimo  
terrarum Urbiumq; theatro spectaret Or-  
bis; Tuq; ut videres sub alieno sole, quæ  
mente tenes, ad exteros protraxisti cursum.  
Delphicum Te exoticæ gentes credebant  
Numen, ad cuius oracula ipsi obmutesce-  
bant Tullij: ad graves & maturos ver-  
borum sensus, supercilium suspendebant  
Catones. Iovem adorabant terrestrem, in  
quo Majestatem virtutum, splendores a-  
nimi, naturæ Divinas ferme dotes invi-  
debant Principes, admirabantur populi,  
amabant universi. Didiceras remotos  
Orbis lustrando fines, quanta sit mgnis à  
longe reverentia Viris; plurimis nisi à Te  
exprimenda idiomatibûs. Pretiosa san-



gvinis Corallia, Olympico expolita pul-  
vere in coronas: Illustres Majorum Cera  
ad Aras: insignes honorum tituli in vo-  
ta nonnisi Iovi Capitolino cedunt. Sed  
non tantum alieni soles cara judicant,  
quæ sunt in Orbe rara; etiam natale so-  
lum amplectitur ut carissima. Tulisti Te  
cum, quæ collegisti optima per experienci-  
am; Tibi Gemmæ ingeniorum, Vnioni Il-  
lustrium Virorum, extraneis æstimato in-  
oris auxisti pretium & desiderium in Pa-  
tria. Instar veris vultus ubi Tuus afful-  
sit; gratiores redire dies & soles nitere  
melius Orbi videbantur Polono. Assur-  
gere in amplexus Tui Proceres, aggratu-  
lari Tibi Amicos, populos in plausum ab-  
ire, culmina ipsa honorum ad Te inclinari  
letissimo reditu cœgisti. Et quis in Tuum  
non prorumpat conspectum? ubi occulto  
quodam illicio cunctorum animos in Tui  
amorem trahis. Frons Tua leta & gra-  
vis, Te intuentes exhilarat: Te venerari  
stimulat. Affabilitas oris, illecebra est cor-  
dium, efficax persuadendis obsequijs argu-  
mentū. Modestia, quæ se pingit in Tuo vul-  
tu, ut Te maturum, sic accessu demonstrat  
ja-



facillimum. Ignotum Tibi nomen tumo-  
ris, & quomodo alios extollat fastus, non  
intelligis; quanquam publica æstimatio,  
communis plausus, honor eximius Te al-  
tius efferat. Nempe eminentiorem putas  
mentem illam, quæ, ubi sublimia calleat,  
de se modestissime sentit. Nam sæpe, qui  
alta petunt, nimis ingenio demisse reptant,  
fungus tamen, etsi in Libano protuberat,  
non est cedrus: ignis in aëre fatuus non est  
stella: nec musca dicitur Numen, etsi inter  
delubra videatur. Amore boni publici  
quantum incalueris; etiam à sole domesti-  
co remotus, Te non frigescentem osten-  
disti, cum vel BIPENNI Asciam Tuam citius ad  
volare in solatia, in mille subsidia Patriæ  
desiderares. Animus Tuus, ut communi-  
bus totus intentus curis; sic falli nescius: cui  
pudor & fides justitiæ soror, nudaq; inest  
veritas. Hinc jure merito leges Patriæ  
Tuo cupiunt ab arbitrio pendere, Te in-  
terprete pandi, Tuo dici ore: Tuò judicio  
declarari. Post Patrem Aristidem, quid  
in Te Filio non æquum? post integerr-  
imum, quid ad tantum honorem in Te  
non perfectum? Candidior ætas ipsam spi-



rat innocentiam: qui non dum proventus  
annis, meritâ ac virtutibus ingravescis.  
Pulchrum est dignumq; OSSOLINIA-  
NO Nomine, Te eo tempore prætextâ in-  
duere honorum, quo vernans ætate, post  
plurimam messem, autumnum videbis ho-  
norificum. Habent uberem lætitiæ copi-  
am OSSOLINII, unde gestiant: unde Tuo  
applaudant Honori. Traxit quidem in  
suas partes Hierarchia Ecclesiastica THO-  
MAM OSSOLINSKI Fratrem Germa-  
num Tuum; accurrit tamen, diviniore,  
quem imbibit, spiritu, omnia fausta ad in-  
gressum Tuum autumans; imminentium  
sibi dignitatum auspex, & ut Genere, sic  
Virtute præsagium infallibile. Ducis Te-  
cum in Altum Honoris Tui longas Fa-  
miliarum lineas; quotquot socias ad pe-  
rennaturi Generis & Nominis gloriam at-  
traxerunt OSSOLINII Domos: quot  
Hymænei Illustrissimas accenderunt faces,  
omnes in plausum Tui provocas. Adsunt  
Celsissima longô syllabô recensenda Nomina:  
POTOCII, SZANIAVII, MIACZY-  
NII, LVBOMIRSCII, SZEMBECHII,  
KALINOWSCII, ZALVSCII, TAR-  
LO.



LONES, MNISZKOVII, DENHOFFII,  
ZAMOYSCII, OPALENSCII, MOR-  
SZTINII, CHOMENTOVII, MŁO-  
DZIANOVII, ZBOROVII, KRASIN-  
SCII, KRASSOVSCII, MICHAŁOVII,  
DANIŁOWICCII, IWANOVII, O-  
DROWASII, KISZCZANKOVII, FIR-  
LEII, WORONIECCII, MOSZYNSCI-  
I, POCIEII, HVMIECCII, SIERA-  
KOWSCII, VSTRZYCCII, GIESZA-  
VII, *cæteriꝫ Illustrissimi Viri, qui Te*  
*cum festivis acclamationibus ad destina-*  
*tum Virtuti & Generi Tuo comitantur.*  
*Areopagum. Huc & ego BIPENNEM A-*  
*sciam Tuam, quæ in plausum Tibi evo-*  
*lat. scholasticis instructus pennis à longè se-*  
*quor: huc advolo, unde in Altum Capita-*  
*nealis Dignitatis. Procerum applausibûs,*  
*Equitum gestientibûs animis, omniumꝫ*  
*solennioribûs votis elevaris. Angusti sunt,*  
*quanquã in amplissimis Palatinatûs San-*  
*domiriensis Campis, viae Tuae, qua progre-*  
*deris, tramites; numerofo Tibi applau-*  
*dentium concursu, Urbem plateasꝫ implen-*  
*te. Procurrunt omnes obviam; jam Te a-*  
*lij, suis ut portent manibûs, iter occupant:*  
N alij



alij, ut triumphalem adaugeant ingressum,  
attollunt oculos, vultus & uoces: conscen-  
dunt eminentius; ut se in colossos, in pyra-  
mides erigant: manus eleuant, in volatum  
sese proripere conantur, Te in Alto Ho-  
noris Tui spectantes. Vides omnium effu-  
sos in Te affectus; vota, quæ ad Superos  
pro Te funduntur, audis: propensionem  
æstimas; meam nonnisi pusilli Cracianæ  
Minervæ cultoris, inter tot examina con-  
currentium, in exiguis exarata paginis  
promptitudinem lege; & Cujus ILLU-  
STRISSIMA Domus in Penates meos  
largas effundit gratias: innumeris  
cumulat beneficiis, Te magnis  
caelestium munerum sti-  
patum decoribus, altiùs  
BIPENNIS  
ASCIA TVA  
ferat.